

KLÖFFEN UM AN PRUNN

De bèlt doin jor hòt ònderst gadra't, koa' aute, koa' television ont koa' baschmaschi'n aa nèt. De baiber hom se pfuntn kan prunn za baschn, za klöffen, za kontarn gschichtn ont asou envire.

Asou ist gaben ver de Anna, de Rosina ont de Virginia aa, drai kamaròtten ont drai baiber as hom òlbe vil gamault. Ober sèll as i pin noch za kontarn enk, ist runt an èckstrega gschicht.

S bòsser van prunn ist a bea'ne kòlt gaben ont alura, za nèt pfearn se, de òrm baiber hom ganommen en a schaffl , bòrms bòsser ont hom gabascht de hemeter, de zaser, de untermaidler, de katezaser, de hudern van kinder , de heisler va boll, de lailecher , de main ont de schnaiztiachler.

De Anna as ist gaben de elteste, hòt òlbe u'gahòp a tunkleges tiachl ont ist de tichteste van grupp gaben! De hòt tschòffen en de òndern ont hòt tu' bos as de hòt gabillt. De ist gaben aa de kusina va de Rosina, a dicks baibel pet groasa a'ng ont a lònks virta as ist en aribart finz en de vers ont as hòt bolten bolten klöffft as de Anna ist se entschloven za lisen sa. S leist baibel ist gaben de Virginia, an òrbetren as hòt bea'ne klöffft, as hòt u'tschaugt de lait krump, ober as pet de sai'na kamaròtten ist se òlbe oa'ne gòngen.

Pet de skis van baschn de besch hom se se pfuntn òlla drai kan prunn. As de besch schea' sauber ont bais abia der schnea kemmen ist, hom sa praucht de asch van heart, ont asch hom sa gahòp an schouber bavai za bermen s haus hom sa praucht bolten holz.

An to de Rosina derbail as se hòt pfriglt pet en soaft a zas van sai' mònn hòt s en pfrok en de Anna bes en hèlft an to za schnain au an pa'm as der bint hòt umgaborven. Va brafa kusina hòt s en verhoasn za hèlven en.

En de kloa'n derver ist asou gaben, de baiber hom vil gaòrbetet ont zan an glick sai' se oa'ne gòngen ont hom se tschauck za helven se.

De boch derno de Rosina ist gòngen ka de Anna za schaung mes se ist paroatet gaben za gea' en bòlt ovar de ist gaben en stòll, de hòt tsbunnen "de ist òlbe asou, de ist òlbe spat!" De Anna hòt en zòck as de sèll nòcht ist augòngen a kaibl ont de kua ist nèt guat stonnen, asou hòt se gamiast paroatn a pfonn grofolada ont oier ver za kemmen tsunt ont stercher, ont bos as bichte gaben ist, hòt se gahiatat as de muater araus kimp van pauch, bavai a toal kia sai' storm a, men en dos ding (za saibern se), ovar s ist òlls guat gòngen.

Alura de Anna hòt vil zait praucht za leing òlls en plòz, ont za gornarn de òndern kia aa. De mistern sai' vil gaben ont de zait ist galaft gahasse, de hòt nou gamiast gem de milch en de kaibler ont de sèll ibre, hòt se sa trong en milchhittl a vòrt nèt verr van stòll, ver za leing se en de sissl ver za raman sa o, ont leing sa darno en kibl za mòchen schmòlz.

De Anna hòt en gaholven za riven kan stòll, ont dòra sai' se gòngen kan haus za paroaten der schnèrver pet drinn de pinz as se kocht hòt der to vour aus ont abia zuaspais a stickel spèck van sai' schbai', ont za trinken der gerstan kafè pet drinn a bea'ne guatn bai'!

De zboa kusinen hom mitganommen aa an pail za hòcken ont an kloa'n segu' ver za schnain der larch ont a kloas kaidl ver za sprontsen aus de ost.

Petn schnèrver voll, òlla peada sai se gòngen anau kan an staig as trong hòt kan Lanar. S ist nèt vèrr gaben va Sette Selle, an schea'n plòtz, pet spitzega pèrng ont an schouber luttern.

Der pa'm ist lòng gaben zeichen metre ont za sechen en de Anna hòt tsbunnen "bar prauchen an gòzn to za schnain an au!"

De Rosina hòt tsbunnen petn sèll larch za mòchen pet a stuck a troug ver en summer za lòng trinken de kia ont s ondèr stuck ver za mòchen a naia bedrina ver en haus bavai de familia ist groas gaben ont an ètlana dinger hom nèt plòtz gahòp.

De hom u'pfònk za mèssn der pa'm ont za schnain en rècht, as sem glaim òlls en a vòrt hom sa tsechen a schòrt va schotn as ist verpai sem glaim! De zboa baiber hom an schrick kriagt, bavai de hom gamoa't as ist an per!

De sai' stil plim ont hom schea' tschaut bos as ist. Ober, der sèll schotn ist verschbuntn ont alura sai' se baiter gòngen pet de òrbet. No an ettla minutn ist bider der schotn sem gaben ont hòt gamòcht an groasn lèrm ont s ist bider verschbuntn! De baiber va groas schrick hom zuacht der schnèrver ver za gea' vert over er ist nea'mer gaben en sai' plòtz, ont alura no a bail as se tsuacht hom, a stickel pos andur, de Rosina hòt pfunten de bòrmvlòsch pet drinn der hòlb kafè, ont bis a bi, a sackel lar pet de leistn migeler vare pinz.

De hom gamoa't as hat gamecht sai' der sèll schotn, oder an per as hungere gaben ist, ovar en sèll minut hom se gaheart riarn se bider de luttern ont an ettle'na stèckler ont a an groasn schroa.

Schau anau ont schau ano, ovar nea'met ist sem gaben, de Anna hòt derbail pfunten der schnèrver lar, ont de sai' gahassee vert galaft.

Bail as de sai' noch gaben za laven de Rosina hòt se gadra't ont hòt en pariart za sechen de Virginia hintn sei as hòt sa u'tschaukt pet en de hent an pail. Va groas schrick ont aa bavai de hòt u' gahgòp s lònk virta ist se derèck en de dru' pfòlln ont en a loch garutscht ont hòt ver an moment nicht tsechen. Benn as de ist austònne vour si ist gaben der pail, de pinz ont der spèck. De Anna gòngen za hèlven en ont, de sai' schubet hoa'm gòngen.

No a por to de Rosina ist gòngen kan prunn za baschn de besch, ont s ist kemmen aa de Virginia za baschn de housn va boll, ont de hòt galistn de gschicht van Lanar as de Rosina hòt en kontart.

De Virginia ist plim a bea'ne varbundert, ont de hòt en kontart as en sèll to ist se gaben za schnain s kourn pet en sai' mònn. Ober en de Rosina hòt s pariart òlls asou bor as de hòt en pfròk za gea' en bòlt pet si ont de Anna.

Der to derno alura sai' sa òlla drai en bòlt gòngen, bou as de sai' gaben za schnain der larch. Pet groasn bunder hom sa tsechen as de kloa'n stickler larch sai' nea'mer gaben. De sai' sem stonnen a bail za schaug bes kimm bider der schoth.. ober nicht! Ober òlls en a vòrt hom sa tsechen an rach ont sai' galaft sem za schaug bos as passiart ist.

Aribart kan sèll rach, de Virginia ist nea'mer gaben, ont sem hom sa pfunt lai an ettla sticker larch as hom prunnen. De Anna ont de Rosina hom ogalescht s vaier pet en bösser van tol ont derno hom sa u'pfònk za suachen de Virginia.

De Virginia pet en laven ist garift en a loch, de ist gònz plasiart gaben, packe iberòll, ovar pet en stea'au hòt se tsechen a kloa's lechl en knott. De hòt tschaugt aninn ont hòt tsechen a stuck pinz ont a stickel spèck.

No a zaitl de Virginia hòt se anau krèsplt vare roa', ovar de hòt gaheart bea en gònze laib, de packe hom en bea' tun ovar no a viartl stunn ist se bider avn staigl gaben.

Vour si der sèll schoth as hòt gahòp tsechen de Anna ont de Rosina, ont dora òlls en an kolpo...nicht. En sèll hòt se gaheart schrain de Anna ont de Rosina as hom sa tsuacht.

De Virginia hòt kontart as se ist garutscht ont as de hòt pfunt a loch pet drinn de pinz ont der spèck. De zboa baiber hom tsbunnen as a vi oder eppas ònderst hòt versteckt en bòlt der sai' vermes van sèll to as se sai' gaben za schnain der larch.

Ber ist en bòlt za verstecken s zaig?

De ta sai' vargòngen ont de drai baiber hom se drau tschbunnen, de Anna ist sicher gaben as ist gaben de Virginia. De ist òlbe asou èckstra ont ist gaben de oa'zege za bissn as de sai' gòngen en bòlt bavai de hòt s gaheart kan prunn.

Ver za verstea' ber as ist gaben, de Anna hòt pfrok en de zboa baiber za gea' bider zòmm en bòlt.

De Rosina ist anau gòngen kan an staigl aloa' za klaum au de rispler, de Virginia ist sem glaim gaben ont hòt potsche en korb galeick, enveze de Anna ist ano kan tol gòngen ver za leing zòmm an ettlena klea'nera est.

Òlla drai hom se se pakemmp kan a stroihitt, ont hom garòstn ver a zaitl, ovar der himbl ist tunkle kemmen ont alura sai' se sem gaben za nemmen de kerb, ovar de sai' nea'mer gaben.

Schau hinten de streibhitt, de korbler sai' verschbuntn!!

Iaz de Anna hòt gabelt bissn ber as ist gaben!!

En sèll moment hom sa gaheart an lèrm ont hom tsechen der schotn, de Rosina ist galaft ont hòt pòckt der sèll schotn. Pet groasn bunder de Rosina hòt gahòp en de hent a kinn! De hom nea'mer gabisst bos za song ont dòs kinn hòt sa aa u'tschaukt gònz erschrocken.

Dòs kinn as hòt gahòp velaicht viar-vinf jor ist tschbissn gaben, pet lòngs hor, de gabanter derrissn ont ist beltan erschrocken.

De drai baiber hom probiart za klòffen en, s kinn hòt lai tsòk "Nane" as ist gaben der sai' nu'm. Benn as de Virginia hòt gaheart der doi nu'm ist se bais kemmen ont hòt u'pfònk za rearn. De òndern baiber hom nèt verstònne bavai, ont en sèll hom sa tsechen de Virginia as hòt ganommen s kinn ont hòt s pusst.

Pet a vaina stimm hòt se tsòk "I hòn gamoa't as ist storm gaben. Benn as ar ist augòngen de mai' ma'ma hòt mer an vert tròng bavai de hòt tsòk as ist gaben storm!" "Iaz verstea e òlls! S kinn ist augòngen vour de haret, ont mai mama hòt nèt gabelt s kinn aus de haret!" "Ober i hat nèt gamoa't as de lòk s en bòlt!"

De Virginia hòt s mitganommen hoa'm ont s kinn ist runt vroa gaben!

A boch derno de drai baiber sai' se pfuntn kan prunn, za baschn de klaider van kinn ont de Virginia hòt scheguetart za klòffen! Abia as de hòt nea' gatu'! De ist nea'mer gaben tschamet abia a vòrt!